



БІРЛІК, ТАТУЛЫҚ, ЕҢБЕК ПЕН ІЗГІЛІК МЕРЕКЕСІ

Өз Наурыз – көне мейрам. Наурыз мейрамы ежелгі заманнан қалыптасқан жыл бастау мейрамы. Наурыз мерекесін тойлау дәстүрі дүние жүзі халықтарының көпшілігінің тұрмыс-салтында орын алған. Мереке табиғат пен адамның үндестігін көрсетеді. Наурыз – күн мен түннің теңелген күні. Көктемгі күн тоғысы наурыз айының 21-нен 22-не ауысқан түні болады. Осы күннен бастап күн ұзарып, түн қысқарады. Дәстүр бойынша Наурыз мейрамын бүкіл ауыл, ел болып, әсіресе жастар жағы түгелдей таң шапағатын қарсы алып, ағаш отырғызып, гүл егу рәсімін өткізуден бастайтын. Бұл мейрам – бүкіл шығыс халықтарына ортақ салт. Тегінде Наурыз ұлт мейрамы болғандықтан, оның тарихи маңызының тереңдігі бар. Ызғарлы қыстың кетіп, жаздың келетіндігіне жер бетіндегі тіршілік атаулының барлығы қуанады. Жасы

үлкендер өздерінен кішілерге ақылын айтып, Ұлыстың ұлы күнінің қасиетін түсіндіреді. Адамдар араларында болған араздықтарын ұмытып, бір-бірінен кешірім сұрайды. Бұл күні тек жақсылықтар жасалып, қонақ болып бір-бірінің үйіне барады. Дастарханнан дәм ауыз тиіп, шаңыраққа сәлем беріп кетеді. Осы күнді «Ақ түйенің қарны жарылған күн» дейді халық. Бұл мейрам – адамзат пен табиғаттың үйлесімін паш ететін күн. Сондықтан, Ұлыстың ұлы күнінде Жер Анаға тағзым жасау осы мерекенің басты нышаны болып табылады. Бұл күні адамдар табиғатқа жақындай түсіп, Жер Анамен үйлесім тауып өмір кешуге қадамдар жасайды. Бұлақтар тазартылып, ағаштар отырғызылады. «Бұлақ көрсен көзін аш!», «Бір тал ексең, он тал ек!» деген сөздер осыдан шыққан болу керек. Наурыз – достық, еңбек, бейбітшілік

мерекесі. Әжелеріміз бен аналарымыздың мерекеге арнап дайындайтын тағамдарының өзі қандай керемет! Дастарқанның басты асы – «Наурыз көже» тоқшылықтың белгісі. Наурыз көже жеті түрлі тағамнан жасалады. «Наурыз көжені тойып ішу керек, сонда жыл бойы тоқшылық болады!» деген сенім бар. Дастарқан басында жастар үлкендердің батасын алады. Бата – үлкендердің өзінен жасы кішілерге беретін ықыласты тілегі. Ақсақалдар: «Ұлыс оң болсын! Ақ мол болсын, қайда барсаң да жол болсын!» деп бата беріп, ақ ниеттерін білдіріп отырады.

**Отуншиева Айтолкын
Еркиновна,
Тоқтабек Айжан
Әлімбекқызы М.Әуезов
атындағы ОҚУ-нің «Стандарттау және сертификаттау» кафедрасының
магистр, аға**